

La Terre

Ch'est mi él terre vo bielle si bielle planète qu'al vos abrite pis qui foait vive des gronées énormes éd gins pis d'bestioles éd toutes espèces qu'al vo dvisé. Ej vos appelle tertous à érvénir simplemint au boin sens, à l'existence. I gno gramint d'gins qui crouér't en un diu, p'tête, seuremint meume, puchque cho doé éte mi, ou quique saquoué qui m'érsianne, mais i né s'nomme suremint po « Dollard ou Euro ». Ch'est surtout dsous l'nom d'éch diabe qui feut szés connouaite chétlo !

I gno coèr chinquante énéés in arrière tout allo bien, j'étoais belotte, rétuse, jouasse, donnante, pour tout chan qui vivoait dsu mi pi grace à mi. Quoé qu'ch'est qui s'est passé ?

Tout douchement au début, chés deux diabes is étoai't tchotchots, pis is ont inforchi à ène vitèche po creuyabe in confichtchant dsous leu intercession : chés gins, chés fouéreuts, chés océans, chés glaches éq j'avoais en monché lo ouèche qu'o appelle cho chés pôles.

Pis is ont tout démanglé, déwérwigné, tant qui gno ène saquoué à défustiner is ont tout péténé, imbrondjé sans s'biler d'él suite !

Dusque lo éj foésoais débatter pour aliminter chés rivières, chés lacs, pis fertiliser chés tchultures, du solé pour szé foaire inforchir pis récauffer chés gins. Ej foésoais itou un molé d'vint à l'aprésent pour définir éd foaire querre chés fuelles réchuées.

Edpis un séquant d'années o m'inclave din un carcan qui m'impêche éd communitcher avu l'espace à l'incontre éd mi, du « co2 » o appelle cho ! Ene espèce d'invelope qui blotche tout pis qui m'impèque éd rédjuler min climat pis m'caleur. En plus éd tout cho o ahanse ène gronnée d'coeuses bijuites qu'in n'sait pus qu'è n'in foaire, adon o szés blindje din chés rivières, chés plaches vèrtes... Chl'ieu al est crapée et polluée, l'air qui torne dsu l'tchoeur, chés gins i n'in clatch't avu des nouvelles évnures, pis mi j'in devnin doreuse !

Dusque i gna po longtemps éj pavoais foaire passer tous chés déchets vrimeux avu l'éyude du fort pouvoèr éd régénération qu'él myinne grace à chés océans, un molé comme vo foué apreù ène ribote, mais quainte ch'est continuellemint o n'in put pus !

Adon i gno des gins qu'is sont rassanés pis is ont imaginer la « COB ! » . Quainte j'ai aprind cho j'étoais fin bénache, infin o va arté d'èm foaire des mawais traitemints, d'èm lapider. Chés gin lo is ont décidé ds'érvir pour fixer des dvouèrs avu des dates, pis quainte chés dates is ont té lo i sz'ont rimbarrées pèr la suite ! Chés années is ont passé, inuit os in sommes à l'vingt chonquième éd « COB », pis mn'éto i vo dl'impire et cho vo grand train. Chés poéyis n'bus't qu'à s'chipouiller et s'ahouper sans tnir conte éd chan qu'in m'foait indurer.

A mzure i gno bien quiques chuchons pour tchultiver sans érquértcher d'ingrais chimiques éd poésons pour escofier chés inseques, pis d'touillanderies pour chés mawaises hërberies, pour vénne leu rindemint él pus souvint à l'inconte éd leu tchote cince avu l'appellation « BIO ! ». Ch'est chan

qu'o foaisait naturellemint quiques dizainnes d'énneés putot. Edz'zeutes qui détrit't chés pèrtes éd pétruche pour qui ne s'rènn'tté po din la mér pour étotcher chés pichons. Mais tous chés tchots débrous rafistolés bout à bout n'érpésin't meume po l'cmenchoumint d'él bache d'él mergousserie.

Ejou un premii espouèr pour voulouèr s'in déssaquer ? Crouère à des li-nemains rabouénis ? Atendi ch'temps lo personne n'foait bacher él rindemint de « CO2 ». O voét granmint pus éd vouétures, camions, batieux, avions, ch'est chan qui gno d'pus mawais qu'o laiche foaire !

Achteur qu'a durche à m'démépriser à m'beudler, j'ém vange en m'lanchant din ène bouffèe aussi ardente que d'but in blanc. Quaint éch vint i corne in tempête ch'a n'est pus chés fuelles qui l'importe mais chés abes qui dérachène en défustinant des fouérets. Mes érnus is sont si puissants qu'is in-mne't tout chan qui gno dsu leu passage, chés vouétures, chés routes pis is acouft't d'ieu chés camps pis chés pouéyis. Em furie m'aconduit à m'imbraser à par mi pis ragalir in chènes des fouères pus que chintainaires et berziller des quartieux de ville. N'crouéyez po qu'ej foais cho par agrémint ou par goût car j'ém mutile pis m'foais souffrir él martyr au dela du supportabe. Cho évenin in moin d'deux sans éq j'él voèche s'rappeucher, ej sais pus gérer, j'ai tellemint dzoin d'éyude ! qui m'in aboulera pour ém rapager ?

Peindaint ch'temps lo à chaque fouos qu'ej sus mal ému chés gins is s'lamint't pis bréye't, chés diabes is di'tt malédiction naturelle ! I gno ti quiqu'un pour crouère tanc et pi coèr à ène catastrophe naturelle !

Edpus des millénaires j'ai hansé pis ablotché ène diversité éstraordinaire, des dizaines éd milles éd sortes éd bestioles pis d'insèques vi'f't avu mi. Edpus un rien d'temps ène race, él darène éq j'ai maginé à s'lanche à tout éscofier, berziller, des gronnées d'tchottes bêtes is ont déjo passé pis chés animaux seuvages is rapiotich't. Ed qué drouot o put massacrer chan qu'jai crée pis qu'ch'est min bien ?

J'chu ène grossieuse boule éd fu pis d'roc dsu l'tchelle à msure j'ai foait ène pieu d'terre pis d'ieu, juste chan qui feut pour apat'ler tous ceusses qui vi'f'tté dsu mi. Ch'est vrai éq l'ieu al n'est po dépatagée éd manière équitable, adon pourquoi n'po l'aconduire din des grainds tuieux ouèche qui l'in mantche comme o l'foait pour éch pétrole à doû qui n'na po. Portant i l'existe un nivieu éd technologie qui poroét bien nos foaire vive confortablement, mais par négligence pis pour ratrucher dsu l'sécurité o voét d'pus in pus souvint d'avanies d'ène gravité estrémme. Des fabriques qui brul't des centrales nuccléaires qui ésplos't des batieux qui s'infique din la mer in éperlindjint des tralées éd couéchonneries permanentes !

Chés gins i cminch'té à avoèr él trouille d'él suite éd l'existance dsu l'terre, j'en intènne meume précher que déjo édz avitureux s'imbertch't à l'érvue d'ène planète qui poroét évirtuellemint rchuoér des térriens, cho n'ém rassure po !

Iront t'ils jusqu'à tant qu'il n'y ai pus d'existance dsu l'terre pour s'in-r'naller installer pis s'ahouper à quiques uns au tchul dl'éspace din un instinct d'conservation ?

Est-ce qu'ej doés laissii foaire pour él continuation d'él race humaine, ou alors ej met un therme o tout cho ?

J'pus din ène frénike ardente poustitcher chés éléments insanne din des malédictions
 térribes éd vint, d'ieu pis d'fu pour tout grimbouler tout effacer du passé. I m'in coutra, i vo
 m'fallouèr pétète trouos à quate voèr chonq millénaires pour m'erquintcher, mais quoè qu'ch'est-
 qu'ch'est à l'inconte éd mes quate milliards chonq chin chiquante mi'ions d'énées. Alors que chés
 humains qui n'ont que deux mi'ions chonq chint mille d'énées is éront passé à tout jamouais, mi
 peindaint ch'temps lo j'foérai èm renéchainche pour érvénir vierche comme au cmenchoumint pour
 maginer ène nouvelle vie, mais po forchémint l'meume... !

Bijuite	inutile, préjudiciable
Débrou	initiative
Durche (qu'à)	continu (que cela)
éperlindjeu	jeter en éparpillant
Grimbouleu	chambouler
Inclaveu	enfermer
Intercéssion	influence
Mal ému	de mauvaise humeur
Monché (en)	quantité(en)
Péténé	piétiné
Poustitcheu	provoquer
Ragalir	réduire
Tchotchot	tout petit